

**ATASSUT****UKA 2016/88****Steen Lynge****19. 10. 2016**

**Naalakkersuisut peqquneqassasut aasaanerani nalunaaquttap nikittarnera pillugu,
Namminersornerullutik Oqartussat Nalunaarutaat nr. 19, 5. Oktober 2006-imeersup,
atorunnaarsinnejarnissaannik, alajangiiffigisassatut siunnersuut.**

(Inatsisartunut ilaasortaq Per Rosing-Petersen, Attaviitsoq)

Atassut-mit siunnersuuteqartoq Per Rosing-Petersen, Attaviitsoq qutsavigaarpus siunnersuuteqarneranut.

Nalunaaquttap upernaakkut siuartittarnera aammalu ukiakkut kinguartittarnera innuttaasut ukiut tamaasa malugisarpaat. Nunatsinni nalunaaquttap allanngortitanera aallaaveqarpoq, Europa-mi nalunaaquttamik allannguisarneq pisarsarmat, tamannalu tunngavigalugu nunarput tulluarsarsimalluni. Europa-mi taamatut nalunaaquttamik allanngortitsisarneq aallaaveqarpoq, ikummatissanik atuinermik annikillisaaniarneq anguneqarsinnaaqquullugu.

Nunarput silarsuarmioqatitsinnut malinnaassaguni, pisariaqarpoq sutigut tamatigut nunatta tulluussartarnissaminik piareeqqassalluni, tamannalu tunngavigalugu aasaanerani aammalu ukiuunerani nalunaaquttat nunatsinnut eqqunneqarsimapput.

Taamaattorli Atassut-mit isumaqartuarpuugut, inuiaqtigittut pisussaaffigaarpus suut tamaasa nunatsinni atuutsilerneqarsimasut ataavartumik nalilertuarnissaat.

Naalakkersuisut akissuteqarnerminni erseqqissaatigaat, nunatta EU-mut tulluarsarnissaa anguniarlugu Inatsisartunik isumaqatigiissunit 1989-imi tamanna aaliarngerneqarsimasoq.

Siunnersuuteqartup tunngavilersornermini ilaatigut nalunaaquttap allanngortittarnerisa qanoq inuiaqtigiiinnut kingunerqartarnerinut misissuinerit arlalissuit taakkartorpai. Misissuinerit taakkartorneqartut takutippaat, nalunaaquttamik nikitsisarneq, peqqinnissamut ulorianarsinnaasooq aammalu angallannermut ajutoortarnernut peqqutaasarsimasoq.

Atassut-mit pingaartitarpuugut, Inatsisartuni sulinermi innuttaasut oqariartuutaat tusarnaassallugit. Nunatsinni silami timersornermik ingerlataqartut amerlasooriarlutik oqariartuutigisarpaat, ukiakkut aammalu ukiukkut silami timersuutinik ingerlatsinerme ullukkut qaamanerup annertuumik pingaarteqartarnera.

Nunatsinni maanna atuuttup, tassalu nalunaaquttap ukiakkut kinguartittarnera silami timersornermik ingerlataqartunut pitsaanngitsumik sunniuteqartarnera, sungiusaasunit arlaleriarluni ukiuni kingullerni oqariartuutineqartarpoq.

Ukiakkut nalunaaquttap kinguartinnerisigut, ualikkut timersuutinik ingerlatsiniartilluni, taarsiaartarnerata inuit piumassusaannik annikillisitsarnerata kinguneranik, inuit timersuutinik ingerlataqartut ukiakkut ukiukkullu ikilisarnerat maluginiarneqartarsimasoq, ilaatigut sungiusaasut oqariartuutigisarpaat.

Atassut-mit timersorneq peqqissutsimut aammalu pinaveersaartitsinermut aqqutitut atorneqartarnera pingaartitaraarput. Tamannalu tunngavigalugu Atassut-mit isumaqarpugut nunatsinni timersortartut oqariartuutaat tusarnaartariaqaripput.

Atassut-mit minnerunngitsumik kissaatiginartipparput nalilersorneqassasoq, nunatsinni nalunaaquttamik kinguartitsisarneq aammalu siuartitsisarneq atorunnaarsinneqassagaluarpat, qanoq nunatsinni tunisassiornermut avammullu tunisisarnermut kinguneqassanersoq.

Taamaammat Atassut-mit siunnersuutip kinguneriumaagassaasa nalilersorneqarnissaat kissaatigalugu ataatsimiitsitaliamut susasssaqartumut ingerlaqqinnissaa inassutigissavarput.

Qujanaq.